



Protocol

dalla seduta dil cussegl da vischnaunca,
venderdis, ils 15 da matg 2020: allas 20¹⁵ – 22⁴⁵
Liug: Center da sport e cultura, halla da tennis

Presidi: Mario Flepp

Actuara dil di: Ursina Murer-Fatzer

Presents:

- | | | |
|---------------------------------|---|--|
| a) Cussegl | Christoph Berger
Armin Berther
Stefan Columberg
Adrian Deflorin
Edgar Durschei
Rita Huonder-Tenner | Giusep Lozza
Armin Manetsch
Helga Probst-Linder
Livio Zanetti |
| b) Suprastonza | Robert Cajacob
Clemens Berther
Victor Flepp | Wendelin Jacomet
Jris Lombris |
| c) Perstgisas
cussegl | Admir Jasarevic
Anna Maria Genelin | Christian Loretz
Martino Sabbadini |
| d) Perstgisa
actuar | Paul Duff | |
| e) Cumissiun
da gestiun | Beat Hosang
Manfred Caviezel | |
| f) Perstgisa
cum. da gestiun | Toni Huonder | |
| g) Canzlist | Andri Hendry | |

Plaid d'avertura entras il president

Miu plaid dad oz vegnel a tener cuort, denton entgins patratgs davart il temps burasclus cun il virus "corona" lessel menziunar.

Naven dad in di sin l'auter ei praticamein tut stau eri. Il virus "corona" dominescha nossa veta, nies mintgadi. El caschuna tema e derasa malsegirtad tier biars. Plinavon ha il virus ina gronda influenza negativa per nossa veta sociala e sin l'entira economia. Nus vegnin a pitir aunc biars onns giudlunder. L'incarica dil cussegl federal ei stada en emprema lingia da proteger la sanadad ed el medem mument da risguardar ils basegns dall'economia. Naturalmein dat ei cheu adina sabiuts e specialists che savessen tut meglier che las persunas ch'ei sfurzadas d'analisar la situaziun e gest tenor da prender las endretgas decisiuns resp. mesiras. Per l'entira populaziun ha ei giu num da suandar las mesiras surordinadas e cheutras da proteger sesez sco ils auters. Quei denter auter cun mesiras da higiena pli severas, cun tener distanza in da l'auter sco era cun restricziuns radicalas per occurrenz. Era sch'igl ei buca stau lev da setener vid quellaz ordinaziuns ei la gronda part dalla populaziun suandada ils cussegls digl cussegl federal. Las mesiras abruptas han segirefranc effectua ch'ins sa plaunet sluccar las restricziuns pridas il mars vargau.

En quei temps burasclus ed aunc adina:

- Ha ei num da segidar in cun l'auter aschi bein sco pusseivel. Denton sto ei veramein dar ina tala crisa per che quei seigi pusseivel?
- In'otra damonda ch'ins astga segir tschentiar ei: Vegn ei ad esser suenter la crisa tuttina sco avon?

Jeu sperel denton ferm che nus savein emprender ord quella crisa e che nus prendein cun nus ils effects positivs ch'ei resultai il davos temps.

- En l'emprema lingia:
Il spért solidari - segidar e star en in per l'auter era suenter la crisa.

Da cheu anora in grond engraziament a tut quels ch'ei segidai cun ils auters en ina fuorma ni l'otra. En special lessel menziunar cheu la giuventetgna ch'ei demussada fetg solidaria e purschiu maun ed agid per quels che han duvrau.

In special engraziament va era al persunal dil center da sanadad Puntreis. Grazia a lur engaschi nunstunclenteivel e cunscienzius ha ei entochen il di dad oz dau negins cass da "corona" en casa. Vinavon ha il persunal capiu co levgiar la veta da mintgadi als cussadents e quei cun organisar differentas occasiuns.
- In auter motiv ei:
Per l'emprema gada e quei suenter 30 onns, ei il Himalaja en las Indias puspei staus veseivels. Fotografias ein circuladas nua ch'ins vesa sin ina distanza da 200 km ina cadeina da cuolms sco ins ha gia dapi "decennis" buca viu pli.
- A Venezia ei l'aua puspei clara ch'ins sa schizun veser co las medusas (qualas) senodan.
- Tgei effect ch'il "Lockdown" ha, havein nus era saviu constatar cul traffic duront ils dis da Pastgas enviars il sid – neginas colonnas da traffic sco usitau. Per motivs che nus essan stai dapli a casa serevegn era igl ambient. Quei fatg duess esser in muossavia co nus savein semover effectiv egl avegnir.

Il cusseglier federal Alain Berset ha a caschun d'ina informaziun detg il suandont:

"Nus essan buca pli disai da viver senza saver co ei va vinavon. Mo gest vida quei stuein nus puspei s'endisar e restar flexibels".

Gest cun quels plaids siarel miu plaid d'entrada.

Informaziuns:

Mortoris:

Ursulina Wetter-Jacomet, naschida ils 28-01-1942, morta ils 10-03-2020
Catrina Manetsch-Thomann, naschida ils 24-03-1926, morta ils 21-03-2020
Beata Elmiger, naschida ils 20-06-1932, morta ils 31-03-2020
Anna Manetsch-Spescha, naschida ils 10-04-1931, morta ils 01-04-2020
Mario Gadola-Seglio, naschius ils 27-05-1935, morts ils 01-04-2020
Gertrud Schnoz-Gerig, naschida ils 22-09-1944, morta ils 12-04-2020

Naschientschas:

Shane Epp, naschius ils 21-03-2020, fegl da Sandra e René Epp
Sophie Joy Zweidler, naschida ils 22-04-2020, feglia da Kate e Thomas Zweidler

Tractandas:

1. Protocol 25-2017/2020
2. Rapport da gestiun e quen 2019 (messadi nr. 42-2017/2020)
3. SIE 2021 Via d'ual Plaunca Su – Pardi: Project e credit per segironza e reparatura (messadi nr. 43-2017/2020)
4. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér
Il president: L'actuara dil di:

Mario Flepp

Ursina Murer-Fatzer



Cussegl da vischnaunca 2017/2020
Protocol nr. 26
Seduta dils 15 da matg 2020

1. Protocol

Protocol nr. 25-2017/2020

Il protocol ei vegnius tarmess tier per posiziun. Enteifer ils tschun dis fixai ei vegniu inoltrau neginas objecziuns.

*Il protocol vegn **approbaus senza midadas.***

Cussegl da vischnaunca Disentis/Mustér
Il president: L'actuara dil di:

Mario Flepp

Ursina Murer-Fatzer



2. Rapport da gestiun e quen 2019 (messadi nr. 42-2017/2020)

Presentaziun:

La fatschenta vegn tgamunada dil vicepresident Giusep Lozza.

Suprastonza:

President communal: Robert Cajacob

Il quen communal siara cun in resultat positiv. Il quen sco era il messadi han ils presents retschert per posta electronica. En quei temps burasclus han ils responsabels segirefranc anflau il temps dueivel per studegiar ils acts. Per damondas en detagl stattan la suprastonza communal sco era il canzlist Andri Hendry bugen a disposiziun.

President cumissiun da gestiun: Manfred Caviezel

Conform ad art. 54 dalla constituziun communal e dil regulativ per la cumissiun da gestiun havein nus examinau l'administraziun communal ed il menaschi finanziel pigl onn 2019.

Gestiun

La lavur dalla suprastonza e dall'administraziun ei vegnida controllada per gronda part entras ils protocols. Differentes temas ein vegni discussiunai cun las autoritads communalas ed ils emploiai dall'administraziun. La controlla ha mussau che la suprastonza e l'administraziun communal lavuran conform allas prescripziuns legalas.

Quen 2019

Il quen 2019 ei legreibels, el siara cun in surpli da frs. 216'000.00. Il cashflow ei s'augmentaus en cumparegliaziun cun igl onn 2018 per 0.3 milliuns sin rodund 2.1 milliuns francs ed ha lubiu alla vischnaunca da finanziar las investiziuns nettas da rodund 1.9 milliuns francs cun agens mieds. Aschia ei il deivet net sereducius sin 2.2 milliuns francs. Igl augment dil cashflow ei da declarar cun ina reducziun da cuosts, in augment d'entradas sco era in gudogn en las finanziaziuns specialas.

Il preventiv 2019 ed il quen 2019 corrispundan per gronda part. Las posiziuns che divergeschan fetg ein per gronda part motivadas entras influenzas externas (tgira, survetsch d'unviern etc.). La gronda divergenza ella sparta cultura e temps liber ei igl augment dalla prefinanziaziun dil CSC. Tier las finanziaziuns specialas lein nus remarcar che la sparta dismessa e purificaziun dall'aua (+54'000) e dismessa da rumians (+700) muossan ora pigl onn 2019 in gudogn, aschia che omisduas spartas finanzieschan sesezzas.

CSC

La sperdita da rodund frs. 220'000.00 dil CSC ei en rama dils davos 5 onns. Ils cuosts han saviu vegnir reduci levamein, denton ein las entradas sereducidas. Cun il quen 2019 ei finalmein era ina repartiziun dils cuosts da personal sin las differentas spartas tenor ina clav da repartiziun vegnida introducida. En cumbinaziun cun la repartiziun dils cuosts d'energia e scaldament (dapi 2016), san ins aschia cumparegliar meglier las differentas spartas ed analisar ils cuosts effectivs ils proxims onns. La revisiun tecnica dil quen dalla vischnaunca e dil CSC ei vegnida exequida dalla Confidar Fiduziaria SA cun sedia a Glion. Sin basa dils resultats dils revisurs externs, atgnas controllas e sclariments e discussiuns cun la suprastonza communal vegn la cumissiun da gestiun tier la conclusiun ch'il quen 2019 corrispunda allas normas e prescripziuns legalas.

La cumissiun da gestiun engrazia alla suprastonza communal per la gronda lavur prestada duront igl entir onn en favur dalla vischnaunca. Naturalmein han il cussegl da vischnaunca sco era tuts emploiai dalla vischnaunca meritau in grond engraziament.

Discussiun:

Cussegl:

Cto. 3411.3893.00 deposit prefinanziaziun CSC: Ins sa buca s'accordar cun in alzament naven da frs. 900'000.00 sin ina prefinanziaziun dad 1.3 milliuns francs. Tier in'amortisaziun els proxims 33 onns ei quei ina summa da rodund frs. 12'000.00 ad onn che vegn buc amortisada pli. Cun quei agir lessen ins evitar da mussar ora in meglier quen final. Igl ei clar che quei ha negin'influenza sin il cashflow. Denton ei fuss motivont da mussar ora inagada in meglier quen ch'ils quens dils davos onns.

Gerau Clemens Berther:

Igl intent ei da preparar ina buna finanziaziun pil futur dil CSC. La suprastonza communal ha giu acceptau la proposta dalla cumissiun en connex cun la prefinanziaziun. Ins vul cun quei agir preparar bein las finanzas per silsunter saver investir el CSC. Igl onn 2018 han ins gia fatg ina prefinanziaziun dad 1.3 milliuns francs. Per igl onn 2019 han ins era nudau ils 1.3 milliuns francs. Igl onn 2020 quantan ins da far ina prefinanziaziun da frs. 600'000.00. Cun quei agir calculeschan ins cun reduziuns da cuosts da menaschi d'annualmein frs. 100'000.00 e quei quintau sin 33 onns. In pass anavos sin frs. 900'000.00 dat mo in falliu maletg e cudezza da far dapli investziuns. Ins vul cun ils 1.3 milliuns francs levgiar il buordi financial pils proxims 33 onns.

Cussegl:

Cto. 3411.3632.00 cumpart cuosts CSC: Sch'ins cumpareglia ils cuosts da menaschi da frs. 227'338.33 ed il svilup dallas cefras naven digl onn 2014 entochen 2019, sche dat il sistem da menaschi da patertgar. Cun haver optimau las purschidas sesaulzan las sperditas onn per onn. Igl onn 2014 era il conto vegnius engreviaus cun rodund frs. 144'000.00, igl onn 2016 cun rodund frs. 212'000.00 ed igl onn 2019 cun rodund frs. 227'000.00. Ei sto vegnir fatg las ponderaziuns schebein las purschidas sco era ils process da lavur ein adequats al temps. Sche la tendenza crescha vinavon a quella moda, daventa il CSC in pulit buordi per la vischnaunca.

Gerau Clemens Berther:

Il menaschi CSC ei dependents dallas occurenzas che occuoran duront igl onn ora, seigi quei cun events pli gronds sco p.ex. l'ex ni era cun gruppas da camps pli grondas. Igl onn 2020 san ins gia uss dir ch'ei vegn a dar ina pulita sperdita, cun quei che pliras gruppas han giu d'annullar la reservaziun ni ch'ins ha buca saviu prender muort la situaziun actuala. Buc d'emblidar ei era ch'il CSC ei aviarts 364 dis/onn. La cumissiun ei pertscharta ch'ei dat purschidas sco p.ex. il glatsch che cuostan enorm e rendan nuot. Denton buc d'emblidar ei che quei ei ina purschida da divertiment per la populaziun sco era pils hosps. Cun la renovaziun previda quantan ins da saver optimar las purschidas e frequenzas sco p.ex. en la halla da tennis che savess vegnir nezegiada a differenta moda e maniera. Cheutras ei era la proposta d'alzar la prefinanziaziun dil CSC sin 1.3 milliuns francs sedada.

Cussegl:

Cto. 5720.4631.00 contribuziuns cantunalas: Stracta ei cheu da contribuziuns cantunalas pils fugitivs e san ins quintar cun la contribuziun da rodund frs. 71'000.00 mintg'onni ei quei ina contribuziun unica?

Canzlist Andri Hendry:

Quella contribuziun vala buc per ils fugitivs che habiteschan el center da transit Bellavista. Cheu stracta ei da fugitivs da contingent q.v.d la vischnaunca ha d'integrar quellas persunas el mintgadi communal. La confederaziun paga ina pauschala globala als cantuns. Ils cantuns repartan lu ils daners en las vischnauncas, las qualas dattan dimora a fugitivs da contingent. La vischnaunca da Mustér ha giu ina famiglia ch'ei stada sesenta 1½ onn en vischnaunca. Quella famiglia ha dil reminent bandunau Mustér pils 31 da mars 2020.

Sche la vischnaunca retscheiva buc ulteriurs fugitivs da contingent, sche dat ei era neginas contribuziuns en quella dimensiun. Per la vischnaunca va la contribuziun concedida la fin dils quens si (cuosts da miedis, habitaziuns etc.). Pia la vischnaunca ha buca da metter sisu, denton resulta era negin gudogn ordlunder.

Cussegl:

Cto. 6150.3141.01 survetsch d'unviern: Igl augment da rodund frs. 83'000.00 enviers il preventiv 2019 ei pulit aults. Co san ins argumentar tala differenza?

Gerau Wendelin Jacomet:

La rumida da neiv dils passapeis basegna dabia lavur e cheutras resultan era aults cuosts. Ils cuosts finals dalla rumida da neiv dapenda era adina dall'intensidad da neiv e tgei unviern che nus havein giu.

Cussegl:

Cto. 6190.3160.00 tscheins d'affittaziun: Ei quei il tscheins pil local che la vischnaunca ha affittau dil militar? Ei quei gest la summa totala? Il forestalessor sco era ils pumpiers fan gie diever da quei local.

Gerau Clemens Berther:

Denter la vischnaunca ed il VBS/UPC ei in contract d'affittaziun avon maun. Il tscheins annual ei fixaus sin frs. 18'000.00 pil baghetg resp. ils locals dil menaschi tecnic (forestalessor/stradalessor) e pumpiers. Il tscheins vegn tenor ina clav repartius sin las spartas numnadas.

Canzlist Andri Hendry:

La cumpart dil tscheins d'affittaziun pils pumpiers surpren la Corporaziun dils pumpiers Sursassiala. Cheutras ei il tscheins effectiv buc veseivels el quen communal. La clav da repartiziun munta a 60% menaschi tecnic e 40% pumpiers.

Cussegl:

Cto. 8400.3300.00 amortisaziuns ordinaras: Co san ins argumentar la differenza da rodund frs. 89'000.00 enviers la summa budgetada?

President communal Robert Cajacob e canzlist Andri Hendry:

La gronda part dils cuosts ei pigl indrez da far neiv per la loipa Cadi a Fontanivas. La survesta dallas investiziuns sin pagina 38 muossa ora las amortisaziuns fatgas. L'emprema contribuziun dad 1 milliun francs ei ida pils indrezs da far neiv el territori da skis a Disentis/Mustér. En concordanza cun igl uffeci da vischnauncas han ins decidiu d'amortisar il milliun sin 15 onns. Cheutras resulta in resultat da rodund frs. 66'000.00 per igl indrez da far neiv (14650). La contribuziun alla Loipa Cadi (14030.01) ei amortisada cun rodund frs. 36'000.00. Quellas duas summas ein cudischadas sut l'amortisaziun en la sparta turissem.

Cussegl:

Cto. 6150.6370.00 e 6150.6370.10 perimeter Via Run e Via Raveras: Il preventiv 2019 quintava cun entradas da rodund frs. 297'000.00. Il quen 2019 muossa neginas entradas. Ord tgei motiv? Dat ei aunc autras vias da perimeter ch'ei buca liquidadas? Quellas pendenzas influenzeschan la finfinala il quen da vischnaunca q.v.d il deivet communal per habitont vegness sminuius sche tut fuss liquidau.

Gerau Wendelin Jacomet:

Las lavurs da construcziun alla Via Run eran planisadas pigl onn 2018. Muort igl entardament dalla procedura han ins pér saviu entscheiver a construir igl uost 2019. Il medem vala era per la Via Raveras che vegn liquidada uonn. Pendent ei aunc il quen final dalla Via Sogn Placi e dalla Via Sogn Gions. Il quen final per la Via Sogns Gions ei semtgau per l'approbaziun entras la suprastanza communal. La suprastanza communal tracta quella fatschenta alla seduta dils 18 da matg 2020. La Via Sogn Placi ei medemamein en la fasa finala e la pendenza vegn liquidada el decuors digl onn 2020.

Cussegl:

Cto. 7201.6370.00 e 7201.6370.01 taxas da colligiazion alla canalisaziun e serenera: Las differenzas denter il preventiv 2019 ed il recav 2019 ein pulit grondas. Tier la canalisaziun munta la differenza rodund frs. 176'000.00 e tier la serenera rodund frs. 126'000.00. Ord tgei motivs?

Canzlist Andri Hendry:

Per saver dar il quen definitiv sto il schazetg esser avon maun. Il quen provisorio per las taxas vegn mess a quen gia tier la lubientscha da baghegiar. Entochen ch'il schazetg d'in baghetg arriva tier la vischnaunca passa in pulit temps. Il project Catrina Resort ha p.ex. aviert igl entir menaschi il december 2019, denton il schazetg definitiv era buc aunc avon maun. Quellas taxas vegnan cudischadas el quen 2020.

Cussegl:

Cto. 8110.5010.15 Via nr. 15, Via Quadras (Caprau): Tgei consequenzas finanzialas han ils incaps tier la Via Quadras?

Gerard Clemens Berther:

Las controllas davart las lavurs sco era ils quens succedan entras ils inschigniers, igl uffeci cantunal sco era entras il president dalla cumissiun da meglieraziun, Walter Deplazes. Ils cuosts per las lavurs supplementaras ein vegni finanzia cumpleinamein entras igl uffeci d'agricultura e geoinformaziun dil cantun Grischun. Lavurs supplementaras resp. cuosts supplementars entras tals incaps che pretendan mesiras nunspitgadas han buca d'engrevegiar las autras vias da meglieraziun planisadas.

Proposta dil cussegl da vischnaunca

Cussegl Mario Flepp propona al cussegl da vischnaunca da crear in ulteriur deposit da frs. 900'000.00 (proponiu dalla suprastanza communal 1.3 milliuns francs) ella prefinanziaziun per la sanaziun cumplessiva dil CSC (total deposit per la fin digl onn 2019, 2.2 milliuns francs).

Decisiun:

Il cussegl da vischnaunca approbescha la proposta da cussegl Mario Flepp cun 8 vuschs encunter 1 vusch e 2 abstenziuns.

Decisiun finala:

Cun risguardar sura correctura dil deposit ella prefinanziaziun per la sanaziun cumplessiva dil Center da sport e cultura decida il cussegl da vischnaunca unanimamein:

1. d'approbar il rapport da gestiun ed il quen 2019;

2. da suttametter il quen 2019 al referendum facultativ conform agl art. 21, lit. a dalla constituziun communal.

Cussegl da vischnaunca Disentis/Mustér
Il president: L'actuara dil di:

Mario Flepp

Ursina Murer-Fatzer



3. SIE 2021 Via d'uaul Plaunca Su – Pardi: Project e credit per segironza e reparatura (messadi nr. 43-2017/2020)

La fatschenta vegn tgamunada dil president dil cussegl Mario Flepp.

Presentaziun:

Suprastonza:

Gerau Clemens Berther:

Tier SIE 2021 setracta ei d'in project global che vegn approbaus dalla Regenza grischuna. Cun quei ch'igl ei previu ina sanaziun vid il tgierp dalla via vegn era il profil interior *"Lichtraumprofil"* reconstruius e cheutras corrispunda il project tenor norma *"WalstrassenStandard"* digl uffeci d'uaul e prighels dalla natira dil cantun Grischun. La via d'uaul Plaunca Su – Pardi ei vegnida construida ils onns 1971 entochen 1976 e sesanfla oz en in stan desolat. La fundaziun po buca purtar pli peisas pli grondas. Vinavon fastedis fa il passadi dalla Val d'Uors sur l'aua da Magriel entochen tier il deposit da lenna a Pardi. La via vegn nezegiada da plirs interessents, seigi quei dalla vart dil forestalessen, dall'agricultura, dils possessurs da mises sco era turisticamein. La cumpart dalla contribuziun dalla confederaziun e cantun munta a 70% dils cuosts.

Cussegl:

La damonda da credit per quella sanaziun tenor messadi fa surstar, cun quei ch'il cussegl tracta mintg'onn il program d'actividad. En quei program d'actividad anflan ins dil reminent neginas damondas per quei project. Daco vegn la suprastonza communal cun ina tala damonda alla sperta?

Cuosts dad 1.4 milliuns francs per quei toc via ein exagerai. Ei dat aunc ulteriurs impurtonts projects en autras spartas e buc mo investiziun per vias d'uaul. Ina sanaziun dalla via da catram ei giustificada, denton cun ina varianta pli semplia.

Gerau Clemens Berther:

Igl ei correct che quei project figurescha buc el program d'actividad. Ins era dil meini che la via sappi vegnir integrada el project Val da Segnas – Sogn Placi. Muort la situaziun dallas auas sa quei buca succeder sco previu. Ins ei dil meini ch'ins astga buca negligir il manteniment dallas vias existentas. Sch'ins va vid ina sanaziun, duei quella gest succeder tenor normas vertentas. Pertgei tenor lezzas vegnan era las contribuziuns dil cantun mesiradas e definidas. Far sanaziuns parzialas ei a liunga vesta buc cuntenteivel. El project dalla meglieraziun funsila figurescha dil reminent la via numnada. Denton leu ei la via buca vegnida priorisada en fasa in. Per retscheiver contribuziuns ell'altezia da 70% dils cuosts previ, drova ei era dabia lavur da perschasiun. Sin in tal project ei la vischnaunca visada vi sin il sustegn finanziel dil cantun. Autruisa ei in tal project buc realisabels per la vischnaunca.

Proposta dil cussegl da vischnaunca

Cusseglier Edgar Durschei fa la proposta da renviar il messadi nr. 43-2017/2020 e d'incaricar la suprastonza communal da preparar e suttametter al cussegl ina secunda varianta q.v.d in project redimensiunau, tenor standard *"Waldstrassen"* cun construir la punt sur il dutg a Pardi. Il cussegl da vischnaunca retscheiva cheutras la pusseivladad da decider davart la varianta in tenor messadi nr. 43-2017/2020 e varianta dus cun in secund messadi.

Decisiun:

Il cussegl approbescha la proposta dad Edgar Durschei da renviar il messadi nr. 43-2017/2020 cun l'incarica da suttametter al cussegl in ulteriur messadi, ina secunda varianta d'in project redimensiunau, cun 9 encunter 1 vusch ed 1 abstenziun.

Cussegl da vischnaunca Disentis/Mustér
Il president: L'actuara dil di:

Mario Flepp

Ursina Murer-Fatzer



4. Ura da damondas

President communal Robert Cajacob:

Igl ei vegniu inoltrau ina damonda a scret da cusseglier Armin Manetsch che secloma:

"Schebein la vischnaunca da Mustér ha era fatg ponderaziuns da sustener il commerci local en connex cun la situaziun dil virus corona. L'idea fuss da surdar a tut ils convischins bons che san vegnir duvrai mo en las fatschentas en vischnaunca. In tal exempel ei d'anflar ella vischnaunca da Bagnes el Valleis, nua ch'ei vegn surdau a mintga convischin dus bons da frs. 60.00 per far cumpras en vischnaunca e cun quell'acziun investescha la vischnaunca Bagnes 1.0 milliuns francs ell'economia locala. El cass da Mustér fuss quei tier ca. 2'100 habitonts (stan 2018) a frs. 120.00 ina summa totala da frs. 252'000.00".

La suprastanza communal ei fermamein dil meini che quei seigi buc l'endretga sligiazium per segidar cun il commerci local. In motiv ei che buca tuttas fatschentas ein pertuccadas tuttina ferm dalla crisa. Per l'otra segidein nus tuts meglier cun nossa fatschentas indigenas, sche nus cumprein e consumein da principi tier quellas. Cheu ein tut(ta)s convischin(a)s dumandai/-dadas. Ord vesta finanziaria sa la vischnaunca buca selubir in tal agir.

Cussegl:

Sa la suprastanza communal informar per tgei motiv ch'il bus local circulescha en in tact da mintgamai 10 minutas a Faltscharidas? Quei p.ex. cugl emprem viadi allas 09.23 ed il secund viadi alla 09.34. Il tact da 10 minutas vala entochen la sera allas 21.00. La sesiun dil bus da stad entscheiva cun ils 27 da zercladur 2020. Denton certs resorts ein gia occupai per 2/3 naven dils 22 da zercladur 2020. Daco vegn quei negligiu?

President communal Robert Cajacob:

Igl urari dil bus local vegn elavuraus dils responsabels ensemen cun la fatschenta Furger. Plirs discuors han onn per onn liug. Denton ina megliera sligiazium han ins era buc saviu anflar. Mintga giavisch san ins era buca suandar. Tenor Furger cursescha il bus da cert temps pliras gadas vits pil vitg entuorn. En da quellas situaziuns fuss ei pli favoreivel d'empustar il taxi sin basa privata enstagl da financiar il bus local sur la vischnaunca.

Il termin dils 27 da zercladur 2020 ei in datum provisorii. Sch'ins percorscha denton ch'ei ha gia avon bia hosps en vischnaunca, ein ins era prompts da schar cursar il bus 1-2 jamnas avon termin. Beinsavend ch'il bus local ei ina purschida per la sesiun aulta ch'entscheiva dil reminent cun la finiziun dallas scolas e gliez ei la fin zercladur.

Il president communal propona ed organisescha in discuors denter Furger ed ils interessai.

Cussegl:

Co vesa ei ora cun ils investurs dil Hotel Acla da Fontauna? Avon temps ei vegniu rapportau en ina gasetta tudestga pulit negativ sur dils investurs. Tgei novas ha la suprastanza communal en caussa?

President communal Robert Cajacob:

La vischnaunca ei da buna speranza ch'il project Acla da Fontauna ha in avegnir cun ils investurs enconuschents. La vischnaunca ha giu concediu la lubientscha da baghegiar. Helvetia Nostra ha in'ulteriura gada inoltrau protesta enviers il project.

Cussegl:

La grupp preparatoria per las elecziuns communalas 2020 ha giu si'emprema seduta. Sco igl ei enconuschent ei René Epp gl'emprem candidat pil presidi communal. Epp sto denton auncvegnir nominaus ufficialmein. Mintga cusseglier(a) ha l'obligaziun da menar discuors ed anflar candidat(a)s pusseivels(-las).

Orientaziuns:

Gerau Victor Flepp:

Sin l'adattaziun dil regulativ da taxas da rumien vegn desistiu pil mument. Per surluvrar la lescha ha la suprastanza communal instradau ina cumissiun. La cumissiun secumpona da: Mario Flepp (president), Rita Huonder-Tenner, Adrian Deflorin, Marco Tomaschett ed il cau dil departament.

La rimnada da pupi ha liug venderdis, ils 12 da zercladur 2020.

La proxima seduta dil cussegl da vischnaunca ha liug ils 5 da zercladur 2020.

Cussegl da vischnaunca Disentis/Mustér
Il president: L'actuara dil di:

Mario Flepp

Ursina Murer-Fatzer

Disentis/Mustér, ils 15 da matg 2020